



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tiryimym@aolima



tir yimym

TAPAK 7

**Marcus Stoinis New Zealand den masayatetsü**

**Thaksin Shinawatra parole nung chiokogo**



VOL. XXI ISSUE NO. 127 (ADOK 127) DIMAPUR TENTONÜ (MONDAY) TSÜKLAI (FEBRUARY) 19, 2024 ₹ 5.00

## Imla aliba ama CBI-i Nagaland sorkar ketdangsürtem anema ken o benok: NPCC

**Dimapur, February 18, 2024 (Agencies):** Central Bureau of Investigation (CBI)-i Nagaland sorkar ketdangsür asemi süpokrem agiba anema ken o benokba osang angashia aoksar saka iba ya imlaa aliba mapa ka lir ta Nagaland Pradesh Congress Committee (NPCC)-i ashi.

Nagaland sorkar ketdangsübaren ajak nung ochimashi jenti lir anungji imlaa aliba ama atalokogo ta NPCC-i ashi.

Opposition maliba sorkari ochimashi inyaktü ajungmesor aser parnok tangatetba nung anünga lir anungji CBI-i iba mapa inyakba pelashishia agizüker. Ochimashi inyakyim ajanga Nagaland nung aliba nübertem temeten aser kechisarena ajak chimatsür, ta parnokisa metetdaksü.

Nagaland state sorkari inyaksangshi melenshitsüla kechiyong nenoki aakmesen kecha melii ochimashi mapa inyakba ajanga asenok ajak jenjang tamajungi ayir, ta NPCC-isa ashi.

Taoba hopta tu CBI-i Jitendra

Gupta, IAS, Additional Secretary, Department of Agriculture, Rampaukai, Deputy Conservator of Forest aser Auto Vihoi, Veterinary Assistant Surgeon, Department of Animal Husbandry nung anema FIR ka benokogo. Parnoki Nagaland nung Project FOCUS (Fostering Climate Resilient Upland Farming System) maparen nung süpokrem agiba atema tai tonglokja lir.

Iba dak sendakba nung CBI-isa Delhi aser Nagaland nung tesem 7 mita ogo.

Ketdangsür asem ya December 17, 2023 nü Dimapur nungi Delhi-i aodang Rs 71.50 lakh bena aliba sülen bushisüngdang ka tenzüka liasü.

Iba anogo Income Tax Department-i Vihoi yangkhu nung Rs 34.50 lakh, Rampaukai yangkhu nung Rs 21 lakh aser Gupta yangkhu nung Rs. 16 lakh bena alia apu.

Income Tax Department ketdangsürtemi asüngdangya asü dang Deputy Conservator of Forest-i senji Addl. Secretary meiyong lir ta ashi.

## Nagaland nung NCP MLA 7 anema disqualification petition agiener

**Dimapur, February 18, 2024 (Agencies):** Sharad Pawar-i aniba NCP ajanga Nagaland nung MLA 7 anema disqualification petition benoka aliba Nagaland Legislative Assembly Speaker-i agienogo.

Election Commission of India (ECI)-i Ajit Pawar ya NCP lennir ta agizükba nung ajemdaker Speaker Sharingain Longkumer-i iba petition agien.

2023 Nagaland assembly election nung MLA 7 ya NCP

ticket amer takok angu saka parnoki Ajit Pawar-i aniba NCP nung aden. Iba ajanga Sharad Pawar-i aniba NCP-i MLA 7 anema disqualification petition benoka liasü.

"NCP MLA tem- Er Picto Shohe, P Longon, Namri Nchang, Y Mhohemo Humtsoe, S Toiho Yeptho, Y Mankhao Konyak aser A Pongshi Phom nung Constitution of India nung Tenth Schedule nung Para 2(1) (a)

kübok anentsütsü makok" ta February 16, 2024 nü NLA Speaker-i tetuyuba ka agütsüogo.

"Election Commission-i lemtet agiba ajanga political party NCP nung chichiba lennir pusembaji party anema inyakba mapa ka masü mesüra NCP party nung züngsem agienba masü ta ni ajiteter. Anungji iba ken o angadanga ao nung tetsükdaksü ang ajurutsü" ta Speaker-isa ashi.

## Manipur sorkari ITLF anema "No Work-No Pay" tenzüker

**Imphal, February 18, 2024 (Agencies):** Indigenous Tribal Leaders' Forum (ITLF)-i sorkar mapa inyaktertem office-i maotsü tuyuba anema Manipur sorkari 'No work, No pay' tetuyuba agütsüogo.

Hombar nungi Churachandpur district nung sorkar office ajak shibangtsü ta ITLF-i tetuyuba agütsüba sülen state sorkari iba osang metetdaksüogo.

"ITLF-i Hombar nungi state sorkar office ajak shibangtsü tuyuba sangdong ka state sorkari nguogo" ta Manipur Chief Secretary Vineet Joshi-i ashi.

State sorkari iba onük kanga

süoki ia bilemer kechiyong iba ya ozüngi memelaba inyakyim ka lir. Sorkari tetuyuba agütsüba tashi mangartem ozüng tapet kübok temerenshi alitsü, ta Chief Secretary Vineet Joshi-isa ashi.

State sorkar office/rejutek ajak nung authorized leave maliser office-i marur ajak 'No work, No pay' inyakyim tenzüksü, ta paisa metetdaksü.

Central aser State Government Authorities aser institutions/establishments/ Autonomous bodies nung Management Authorities-i staff aser kaketshirtem attendance akangakanga repringtsü metetdaksür, ta Vineet Joshi-isa

ashi.

ITLF-i state sorkar dang Head Constable Siamlalpaul mapa nungi anentsüba meyipa agütsü aser Superintendent of Police Shivanand Surve o Deputy Commissioner S Dharun Kumar na melentsü takhangba agüja lir.

February 15, 2024 nü head constable mapa nungi anentsüba sülen Churachandpur nung nisung telok kati SP aser DC office tem aliba government complex ka nungpoka atu, garitem nung mi senoktsü aser sorkar osettem raksatsü.

Iba mapang security forces-i injang khaloktsüdang nisung 2 khaset aser 30 tema yiru.

## Narongjakertem oshi nung Laishiba adoka saya



Sign Language Bible sayaba sentong nung Deaf Baptist Church nung Sunday School tanurtem aser lanurtemi parnok oshi Sign Language amshia ken atenba noksa nung angur. ( Deaf Biblical Ministry, Naharbari, Dimapur, February 18, 2024)

**Dimapur, Feb.18 (TYO) :** Naga limai Yisu Khrista osang tajung arur küm 150 ajungba mung amongba sülen Nagaland nunga narongjakertemi par oshi, sign language, nung Laishiba züngtetsüsa Bible Society of India-i 'Sign Language Bible' ka adoka Deaf Biblical Ministry, Naharbari, Dimapur nung sayaogo.

Deaf Bible Ministry ya 1987 küm nüpkokertem nem taküm aser tanela nungdak ajak agüja anepalutsü atema Khar nung Rev.Yanger Walling aser kinungtsü Wt.Amongla nati tenzüka lir. Iba DBM nung Deaf Baptist Church tenzüka lir aser iba arogo nung züngsem ajak agi 200 dak tali lir. Tanü iba arogo nung BSI nung tongti zülur Rev.Dr.Kavito G.Zhimo-i Sign Language Bible ya sayatsü aser Tsüngrem o jembia liasü. DBM nung yasa School aser Vocational

Training Unit lir aser tang parnok nangrongjaker tanurtem 70 iba kidang lia züngdagi. Tanurtemji kar tsüraburtemi aser kar temulungertemi tenla agüja yarir. Ano, narongjakertem tain kümer kar kibalembunüra Rev.Yanger Walling tenla kidang temeshi kiyimba kuli agüja kibong kümsür.

Bible Society of India (BSI)-i oshi tapu balala nung Laishiba meyipa kaket küma adokba dang masü saka nüpkortem asoshi parnok Lashiba ' Braille Bible' aser narongjakertem asoshi 'Sign Language Bible' adoka züngdaksür. " Tanü Nagaland nung narongjakertem asoshi Sign Language Bible adokba ya asenok asoshi otsütsü mapa tongtibang ka asütsü. Ibai Naga limai Yisu temeim osang tajung arur küm 150 ajungbamung amongba nung shilem tongtibang ka lir. Tangbo Sign Language

Bible ya Yonah tapu dang adoka lir, saka ano yakta Efesa aser Ruth tapu adoktsü sentong nung lir, " ta tanü iba Sign Language Bible sayaba sentong nung BSI (Translation) Director, Rev.Dr.W.Along Jamiri metetdaksü.

Iba Sign Language Bible adokba ya lbra oshi nung mezüng adokba Laishiba nungi meyipogo aser iba nükjidongji Laishiba ya shitak meyipzüka meimchir ajaki züngtetsüsa tongtsütsüba lir. America nungerro Laishiba tapu ajak ya Sign Language nung meyipzüker lir. Parnoki iba mapaji küm 40 agia inyak, asenoka ibai tetenzüker ser kenü anogobo Laishiba ajak ya asenok meyong Sign Language nung adoktsü imlar ta Rev.Dr.Alongisa metetdaksü.

Sign Language amshia Yonah tapu meyiptsü asoshi luden ka nung parnok nisung 12 shimer

2022 küm nungi inyaktü tenzüker. Parnok züngsem 12 rongnung 9 bo narongjakertem liasü. Parnoki akok tashi tajungba nung Yonah tapu ya parnok narongjaker oshi nung meyiper par arogo purtem nem züngdaksür külenang renem . Sign Language Bible yabo kaket küma adoker masü saka tenük agi tangar kati sign sayua azüngdang repringa anidaksü atema 'visual format' nung dang adoker. Iba mapa ya yaküm 2023 küm Dimapur Ao Baptist Arogo (DABA) pur meyong Studio nung tangoka inyak. DABA nungbo yaküm 2023 küm August 6 anogo nungi temoatsü sentep shia tenla ki sabang nung sentep sentong agiba ajak narongjakertem asoshia Sign Language ajanga sayur.

Tanü amongnü iba sentong nung State Commissioner for Persons with Disabilities,

Nagaland, Wt.Diethono Nakhro; BSI nung Dimapur Auxliary Secretary,Rev.Dr.Yipetso Wezah; Deaf Community Nagaland nung tir Wb.Asangba Longkumer; DABA nung Associate pastor Limaaküm Longchar aser Deaf Fellowship, Kohima nungi Kr.Chumbeni Ovung nungertemi tepela aser tenüngsang o jembia liasü. Japan nungia on line ajanga United Bible Societies nung Consultant for Sign Language Translation Wb.Mark Penner-ia salem osang metetdaksü aser Laishiba meyipba Luden züngsem aser tesayur Kr.Wanchule Magh-i parnok ludeni inyakba osang tatsüka agütsü.

Iba sentep sentong nung Deaf Baptist Church nung sannüker, Rev.Yanger Walling tarur pelaa agizüka jembidang, narongjakertema parnok oshi balaka lir aser tanü parnok oshi nung Laishiba tapu ka meyipa sayaba ya tetenzüker ser ano talangka aotsüba lir ta shisem. Tang Sign Language Bible adok tenzüka mapa ya Rev.Yangeri BSI dang mepishiba agizüka inyakba mapa ka lir.

Iba sentep sentong nungsa Deaf arogo nung tila tanurtemi ken aten aser Laishiba azüng. Iba sentong nung shilem agirtem ajak dang pelaba o Translation Committee nung züngsem Wb.Besutsu Dozo-i ashi aser BSI Dimapur nung tadong tir Wb.Those Krahoi sarasadema iba sentong tembang.



**Dr. Himanta Biswa Sarma**  
Chief Minister of Assam

**KHELE BHI, KHILE BHI**



Sports is not just for winning medals  
but is a medium to win hearts.  
Sports belongs to all for all.

**Narendra Modi**  
Prime Minister

**4608**  
ATHLETES

**20**  
DISCIPLINES

**200+**  
UNIVERSITIES

**11**  
DAYS

## OPENING CEREMONY OF KHELO INDIA UNIVERSITY GAMES 2023

19th February, 2024 at 06.00 PM  
Indira Gandhi Athletics Stadium, Sarusajai, Guwahati

Watch Live On: **SPORTS**

### Chief Guests

**Dr. Himanta Biswa Sarma**

Chief Minister of Assam

**Anurag Singh Thakur**

Union Minister of Youth Affairs & Sports,  
Information & Broadcasting, Government of India

### in the august presence of

**Nisith Pramanik**

Union Minister of State, Home Affairs,  
Youth Affairs & Sports, Government of India

**Nandita Gorlosa**

Minister of Sports and Youth Welfare, Assam

## Khelo India: Transforming Dreams into Triumphs

- **Financial assistance of Rs. 6.28 Lakhs given per athlete to 3000 Khelo India Athletes**
- **331 new sports Infrastructure constructed in 9 years**
- **1,072 Khelo India Centres and 32 Khelo India State Centres of excellence notified along with 296 academies under Khelo India strengthening grassroot sports ecosystem.**
- **878 Past Champion Athletes Engaged as coaches in KICs**



**35 Khelo India Athletes Triumphant in FISU World University Games held in 2023**

- **44,000+ Athletes Participated in 13 Editions of Khelo India Games**
- **63,000+ Women Athletes Participated in 600+ Competitions Across 21 Disciplines**



### Aluyimertem akhangba magizükra onok meyipa maotsü: Dallewal



February 18, 2024 nü Patiala district anasa Punjab-Haryana Shambhu arrtsü nung aluyimertemi longkak aيتدang tangokba noksa nung angur.

#### Chandigarh, February 18

(Agencies): Central sorkari mapang meindoktsüla aser Lok Sabha election atema model code of conduct (MCC) metenzükdang aluyimertemi akhangba onüktem agizüktsüla, ta aluyimertem lenir, Jagjit Singh Dallewal-i metetdaksü.

Amongnü aluyimertem lenirtemi Union minister tem den senden amentsü jelia Shambhu border point nung osangbenertem den jembidang Dallewal-i, "Onoki sorkar dang ya shiner- joko amajok nung mapang meindoktsüla. Model Code of Conduct mebenok tashi senden maneni amentsü, ta sorkari bilema lira aser 'MCC benokogo, anungji onoki kecha mesütettsü' ta sorkari bilema lira aluyimertem kidangi meyipa maotsü. Code of Conduct

metenzükdangyongi sorkari onoki akhangba agizüktsüla," ta ashi.

Paisa, nikongdang 5:30 ako nungi senden tenzüktsü, ta metetdaksü.

"Aluyimertem longkak aittsü atema party kari sponsor masü. Onoki MSP atema ozüing ka agizüktsü, Swaminathan Commission-i benokbatem mapa küma inyaksü aser aluyimertem dang sentsüh atoktsü akhanger," ta pai metetdaksü.

Ano aluyimertem lenir, Surjit Singh Phool-i, Centre sorkari pua aliba aluyimertem chiochtsü ta nangzükba ama meinyaker aser Punjab tesem aika nung internet shibangtsüba den külemi aluyimertem lenir kar indang social media accounts shibangtsür, ta metetdaksü.

State balala nungi aluyimertem meyirjang aika Punjab-Haryana arrtsülen Shambhu aser Khanauri points nung adenshir anogo troknübuba longkak aitogo.

Aluyimertem Delhi telungi maitdaksütsü atema arrtsülen security sepaitem aika lezmükja lir.

Union minister tem aser aluyimertem February 8, 12 aser February 15 anogotem nung senden menogo saka tang tashi telemtetba kecha magitet.

Amongnü nikongdang sorkar tsütsülen nungi Union Agriculture & Farmer Welfare Minister Arjun Munda, Commerce & Industry Minister Piyush Goyal aser Minister of State for Home Affairs Nityanand Rai nungeri aluyimertem lenirtem den senden amentsü.

### Munich nung EAM, S Jaishankar-i Israel-Gaza rara indang jembidi

Munich, February 18 (Agencies): Germany kübok Munich nung Munich Security conference nung temeja sentong ka nung jembidang India External Affairs Minister S Jaishankar-i, Palestine onük dak sendakba nung India-i mapang talangka nungi linük ana tentettsü ajungshia arur, aser tangbo linük aikati ibaji pusemer, ta metetdaksü.

Security Conference nung (Q&A session) Tasüingdangba aser Telangzüba sentong nung Jaishankar den Germany Foreign Minister Annalena Baerbock aser US Secretary of State, Antony Blinken nata liasü.

Jaishankar-i, October 7 nü Israel amakba ya kiralongra lir, ta metetdaksüba den külemi Israel-Gaza rara nung India tangatetba pezü lir, ta metetdaksü.

Jaishankar-i, "Mezüngbuba nung, October 7 nü tatalokba ya kiralongra lir, ta asenoki angatettsüla; kecha agia iba ya metentsütsü makok. Iba ya kiralongra lir. Tanabuba nung Israel-i mangyangba mapang nung civilian meyirutsütsü

mesüra metepsettsüji kanga tongtibang. Tasembuba nung pua alirtem ajak chiochtsüla," ta ashi.

Paisa, "Pezübuba nung, meimchirtem nem teyari balala agütsütsü atema lenmang sadema lapoktsütsüla," ta metetdaksü.

Yaküm October 7 nü Hamas teloki rocket aika amshia Israel amakba sülen nungi tenzükba Israel sepaitemi tang tashi Gaza Strip amaker. Tang tashi nung Israel sepaitemi Palestine nunger 28,858 tepsetogo aser 68,667 yirutsüogo. October 7 nungi tenzükba Hamas telokia bendangertem densema Israel nunger 1,139 tepsetogo.

Russia-i Ukraine amak tenzükba sülen linük aikati Russia den shishilemba masür, ajisiüaka India-i maneni Russia nunger dang totzü alizükba dak sendakba nung tasüingdangba ka langzüdang Jaishankar-i, "Onok atema lenmang aika ali asü?. Telangzübaji au. Iba nungji timtem ali asü? Ibaji timtem ka asü? Lenmang aika alitsüsa ni teyakyak süra nenoki ni maitsütsüla, saka ni nükshitsüla," ta ashi.

### Bendang linüktemia Modi sorkar arutsü, ta meteta lir: PM Modi



February 18, 2024 nü Bharat Mandapam, New Delhi nung BJP National Council senden nung Ato kilonser, Narendra Modi-i jembidang tangokba noksa nung angur.

#### New Delhi, February 18

(Agencies): Amongnü New Delhi nung Bharatiya Janata Party (BJP) Convention nung jembidang Ato kilonser Narendra Modi-i, taruba Lok Sabha election nung party-i maneni takok ngua sorkar akümtsü, ta metetdaksü.

Modi-i, linük renlochtsü atema Congress dak mangdang mali, ta ashi.

"Tanübo alima nung linük ajaki India den tesendaktep tangjuba yangluner. Election agitsü liaka linük balalai July, August aser September tashi nung ni jaoker. Ibaji ajanga linüktemi BJP sorkari maneni takok angutsü ta melung alemba sayur," ta pai metetdaksü.

Tesüiba küm 10 tsüingda BJP sorkar yimsüsüba kübok linük rongsenkettzüng ainba dak sendakba nung Ato kilonser Modi-i, "India-i rongsenkettzüng dollar sen trillion 1 ajungtsü atema küm 60 agia liasü. Tesüiba küm 10 tsüingda onoki linük rongsenkettzüng dollar sen

trillion 3 alizüing tongtetogo," ta metetdaksü.

"Taoba sorkari alima nung rongsenkettzüng tulutiba linüktem rongnung India jenzang 11 buba nung aliba jenzang 10buba mekümdaksütet. Ajisiüaka BJP-i India jenzang 5buba tongdaksüogogo," ta pai metetdaksü.

Opposition party tem aija pai, opposition party temi nangzükba ama inyaksü memetet asütsüa akok, ajisiüaka parnoki yazü nangzüktsü atemabo kecha marendaker, ta ashi.

BJP nung inyaktertem ajungshia Modi-i, Lok Sabha election atongtsü atema taruba anogo 100 ji kanga tongtibang asütsü, anungji anogo 100 tsüingda nüburtem koktetang, ta ashi.

Paisa party nung inyaktertem dang asentenshir tamang agi ano maneni tejangraba nung nendaka inyakang, ta ayongzük.

Anogo ananü BJP Central Convention ya Honibarnü tenzükba liasü.

### Supreme Court-i tuyuba ama Election Commission-i inyaksü: EC

New Delhi, Tsüklai/February 18 (Agencies): Chief Election Commissioner, Rajiv Kumar-i, electoral bonds scheme dak sendakba nung Supreme Court-i tuyuba ama Election Commission of India (ECI)-i inyaksü, ta metetdaksü.

Osangbenertem den jembidang Kumar-i, election commission-i osangtsüsang aser inyakyim ajak teladak süa inyaksü, ta metetdaksü.

"Supreme Court nem agütsüba affidavit nung ibaji lir.

Commission-i inyakyim teladak süa inyaksü aser Supreme Court-i tuyuba ama inyaksü," ta Kumar-i ashi.

Electronic Voting Machines (EVMs) mamshii election agiba atema Supreme Court nung ken o ka benoka lir, aser iba dak sendakba nung tasüingdangba ka langzüdang chief election commissioner-i, "Court nem iba telemtetbaji agidakjang. Nüngdakra court-i tuyuba ama temelenshi benoka inyaksü," ta ashi.

Taoba Brihostibarnü

Supreme Court-i electoral bonds scheme agienadokogo. Iba scheme ajanga information temeden aser pei tebilemba jembiba alema inyaker, ta shia iba scheme agien.

Supreme Court-isa bank tem danga joko electoral bonds tagütsü, ta tuyuogo.

Iba dak alia Supreme Court-i State Bank of India (SBI) dang 2019 küm April 12 nungi tenzükba alizükba electoral bonds osang tejangja Election Commission nem agüjang, ta tuyuogo.



February 18, 2024 nü New Delhi nung Jharkhand Chief Minister, Champai Soren, Congress Tir Mallikarjun Kharge, Jharkhand Pradesh Congress Committee (JPCC) Tir Rajesh Thakur, Jharkhand Congress In-Charge, Ghulam Ahmad Mir aser tangartem senden ka nung tangokba noksa nung angur.



## TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 19, 2024

### Asayartem amungdak

**M**apang tatsüka tsüngda Chümoukedima kübok Sovima yim ya Nagaland nung asayartem amungdak tesem tajung ka asütsüsa 'Regional Sports Centre of Excellence' yanglutetba mapa ya asenok ajaki tenüng asangtsü tim aser iba amaji asenok alidaka ajizüka inyaktsü merangtsüla. Küm metsü jakdang Sovima nung tang aliba asayaba tesemtem Cricket ground nungi tenzüker asaya tapu ajak asayatetsüsa tesem kata mali asü, ajisüaka tang Nagaland chief minister Rio-ba ya Nagaland Olympic Association nung tir kümer külen pai par Sovima yimtak parnok li nung item asayadak tesem ajak amenlokyonga aoba ano maneni asayadak tesem ka khen, ka khen ta kanga karaa Sovima agi Sports Village küma yangludagi. Iba tesem nung tan Nagaland Olympic & Paralympic Games 2024 ayongzüka anogo pungo nü tashi asayaa amungdang, Nagaland nung district 16 nungi asayartem 3500 dak tali adenshia longsutepa asaya tapu balala nung toktepa amungbaji asayamung benjong tuluka liasü. Aji oda, asayar 3500 denji anogo shia tereprangertem meyirijang dak tali adenshia amungba jagi Sovima aser temeket nung alirtem nema senotsü nunga tajangzük aika agütsür alitsü. Asayadak tesem tajung yanglua asayamung mapang shia ayongzüka amungba sentong jagi asayartem dang ajangzükdaksür masü saka iba sentong nung gari amshir, süngo aser chiyongtsü ayokertem asoshi shishilembadak tesem aser mapang tajung ka akümer. Atangji, Sovima agi asayadak tesem tajung ka akümbaji Sovima nunger asoshi dang masü saka Naga nunger ajak asoshi tajangzük aser temoatsü lir, kechiyong Sovima nung yangluba asayadak tesemtemji Sovima nunger meyong masü saka Naga nunger meyong lir. Ajisüaka, telidakpurtem asoshi asayadak tesem tajung peria alibaji maparen aika nung tangar dang nungi maangka tuluba angur. Ibaji kodang angatetdir, Sovima nung Rio-i par kija meyong ama bilema temulung agüja Regional Sports Center mesemtetba amaji, asenok district shia nung yimsüsürtemia saisapong tsütsü temulung agüja inyaktsü. Tia maka, Sovima memesük Dimapur nungbo State stadium yanglu tenzüker metemtet anena lir. Iba tiaji kodang bilemdangdir, Dimapur asoshibo Chief minister-a mesüra MLA-a mali ama mesüra Dimapur nungbo Youth Resources & Sports department purtema mapa mali ama lanurtem asoshi asayadak kimungbo tesadem tajung ka yateta yur teyanglutsür mali kümogo. Ashiko, kenlir külenbo Nagaland state stadium yanglutsü aliba tesem to District Administration-i nisung ishika nem lemsar agütsüogo ta angashitsüa akok. Aji oda, tanü kidanger district ana Dimapur aser Chümoukedima na nung saisapong nung renlokba asadanga amaji, tanga district-tem nung reprangdangra, Mokokchung tashi nunga Mini Olympic & Paralympic ayongzüksüa asayadak tesem makaba tia nung lir. Atangji, district ajak nung Mini Hornbill benjongbo ayongzüka longsutepba angur saka kodang saisapong dang masü saka bendanglen nungi tongtibang yimten lenir noklang anasemka jaoka senden alitsü asoshi sentong yangludir, Kohima aser Chümoukdima nung police training center mesüra Niathu resort nung alitsüba dak alaka tanga district-tem nungbo tanendak aser tamendak tesema magütsütettsü. Ibaji tangar kari arua inyaktsütsü asoshi imlaba agi asü mesüra pei koloki marur aser merajemer ta bilemdanga asenoka tangari inyakba amaji inyak tenzüksüla. Asenokbo tangar nüngsen dang jembia alitsüba masü saka asenoki asenoksasa asen nüngsena tangari tajung inyakba amaji inyaktsü merangtsüla. Asenok ajak asoshi state ka, assembly-a ka, senponga ka aser government-a kasa, anungji terenlokjia kasasa asütsüsa ajaki merangteptsüla.

## OLEMSABANG

### Sensoka Temeden (Yabosameteta alitsüjunger)

- Mr. Imtiakum

*(Yashi adok nungi)*

Agüja aliba senso temeden wazüka Sorkari yimsüsütsü asoshi ozüng telatet PART - IV Arla 36-51 nung latetja lir. (Directive Principles of State Policy) saka asenoki ya metetdi, senso ka temedenji senso ka teinyaktsü den külemi aoer (Rights -goes with duties). Item temeden angutsü asoshi asen teinyaktsü (Fundamental duties) PART-IV -A Arla 51 A nung yamai shia lir.

- Senso shiai Indian temzüng, National Flag aser National Anthem mezüngmeshi masütsüla saka akhum agütsütsüla.
- India lima wazüka teputep aser telongjem atema inyaktsüla.
- India lima tsükchir nungi kümzüka ayutsü senso shia teti renema alitsüla.
- India nung nütsüng nübu, sobaliba balala, tamangba yimsü balala item meraket shingaia meraksatsütsüla saka meraketa akhum agütsütsüla.
- Azü tokshitepba maparen nungi khenyongi pilaa alitsüla.
- Ajak teka amteper India lima temaba jenjangi ajungkettsüla. India temzüngi senso ka teinyaktsü aser temeden shia aliba dak alaka ano senso tajungtemi meteta alitsü temeden aser ozüng aika lir item rong nung kar tatsü agi lemsatepti.

**1) Right to Information Act 2005** - Iba ozüng ya senso kati Sarkar bangdak aser Public Authorities temi kechisa inyaker senso kati metetnüba ajak memeimshi metetdaksütsü iba ozüng yagi melar. Section 7 R-T.I Act nung aliba agi senso kati Government department balala mesüra temzüng ozüng ajanga lateta aliba bangdak (Public Authority) nungi osang kar aginüra ibaji bangdak ajanga anogo 30 tashi nungbosa agütsütsüla ta ashir saka section 8 nung aliba agi osang kar (Information) koba national security amala dak sendaktepa lir itemjibo magütsütsü (Exemption from disclosure). Anogo lateta akaba nungji nai aginüba osangji magütsüra mesüra nai temulung mesüra Section 19 ajanga temeden agüja aliba ama appellate authority dangi anogo 30 tashi nung abentsü saka iba telangzüba jagia temulung mesüra anogo 90 tashi nung Central Information Commission mesüra State Information Commission dangi (Second Appeal) abentsü temeden lir. Section 20 (I) ajanga ashiba agi bangdak ajanga Public Information Officer (PIO) ajanga tim osang magütsüba putetra, pai tim osang (Information) magütsüma tashi Sen 250/- (Rupees Two Hundred Fifty) anogoshia senchi achitsu ibaji 25000/- (Rupees Twenty Five Thousands) tashi atutsü akok. Aser section 20 (2) nung shia aliba ama Central/State service rule nung mela aliba ama officerbaji merenshitsü recommend asütsü. Section 23 Central Information Commission / State Information Commission koba telemtetba agütsüdir iba anema bangdaki (Court) abentsü makok.

**2) Consumer Protection Act 2019** - Consumerji shiba ta süra, shibai oset tsüset sen agi alia amshir mesüra item teyari agir (Services) iba alang taa agütsür (Tatishitsü agi power service, water service, telecom services etc) Asenoki aliba oset jenjang zülua aliba dak tali meshira, mesüra oset/chiyongtsü expired sür lira, mesüra asenoki light bill, water bill, mobile bill shitak agütsür ser nung department/company ajanga service shitak magütsüra ibaji anema District Consumer Protection Council koba district ajunga nung lir idakji sen Crore ka tashi indang ken o benoktsü akok. Nai benokba ken o ji sen crore ka dak tali süra iba ken o jibo State Consumer Protection Council dangi ang abentsü saka ibaji sen Crore ter (10) dak tali jenjang süra National Consumer Protection Council/ Commission dangi ang bentetsü. Iba ama ken o ya shiba consumer lir mesüra Consumer Society teyari agia ken o benoktsü akok. Iba ken o ya timi angadanger consumer kechi takoksa ajuru iba osetji tanga melena agütsütsü iba den Compensation tetemsü agütsütsü.

Indian senso tajung ka asoshi temzüng balala aika ajanga temeden agüja aliba kar asenok den lemsatepogo aser item mesük temeden jenti lir. Ne dak temeden aliba anema lokti, bangdak amala kari inyakra aser ibaji anema temeden bushitsü ne sasa ne tashi aser rongsen agi mekokra mesüra nai koda asutsü lenmang memetetra, itemji yaritsü asoshi Legal Service Authority Act 1987 ajanga senso tajung ka nem taa (fees) kecha magi-e pei temeden bushitsütsü asoshi lenmang lapokja lir. State level nung State Legal Service Authority lir aser district level nung District Legal Service Authority lir. Item teyari agitsü atema para legal Volunteers aser Penal Lawyers tem lir. Nai teyari nungdakra District Court ajak nung Front Office Legal Service Authority ta lapoka angutsü, idakji inyaker nungi aginüba ama angati teyari angutsü.

*(Iba ocet ya Ao Baptist Arogo Padum Pukhuri-i adokba Ranglok Kaket July 2021 Adok nungi agitetta adoktsür.)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Pakistan SC-i Jaranwala nung Khristantem amakba report meshir



Yaküm August ita nung Pakistan nung Muslim nungertemi longkak aitdang Jaranwala district nung Saint John Arogo Tenla ki rongdoktsüba sülen yangji alirtem adenshia aliba noksa nung angur.

**Lahore (Pakistan), February 18 (Agencies):** Pakistan nung Supreme Court-i yaküm Jaranwala nung Khristantem amakba report agi melung mesüi Punjab province sorkar dang anogo 10 tsüingda report tasen agüjang, ta tuyuogo.

Judge asema akümba bench kati Pakistan nung Khristantem densema minorities temeden aser yaküm August 16 nü Jaranwala nung Khristantem amakba indang ken o ka angadanga liasü.

Yaküm Muslim nungertemi longkak aitdang Tenla ki 20 dak tema rongdoktsüba den külemi Khristantem meyong ki noklang aika rongdokja liasü.

Khristan anati Muslim nungertemi kaket 'Quran' raksatsü, ta tai tonglokja Muslim nungertemi Khristantem amak. Iba dak sendakba nung Chief Justice of Pakistan, Qazi Faez Isa-i, Punjab province sorkari agütsüba report ji ngur pa aaker, ta ashi.

Chief Justice-i Punjab province law officer ka dang, "Ni kanga aaker, kechiyong tesüiba ita trok tsüingda iba ken o nung challan 18 dang agütsü. Asenok alima tesem balalai aoba mapang nung 'Islamophobia' (Islam yimsü amangertem tsübuba) anema asenoki ola adoker, ajisüaka yangi Pakistan nung asenoki kechi inyaker? Nenoki ibaji shisadanger asü? India nung minorities kümzüka mali; asenoka India nungertem tsüingsü nung anidakner asü?" ta asüingdang.

Punjab additional advocate general-i Supreme Court dang, ken o 22 benokogo aser nisung 304 puogo aser FIR 22 nungi challan 18 bendenogo, ta metetdakja liasü.

Chief Justice Isa-i, sorkari agütsüba report nungji kanga tongtibang osangtem mali; item rongnung ozüing alema inyakba atema FIRs benokba, item ken o nung nisung kwi dak melung malemerar shia mali, ken o shiaji

koba jenjang nung aliar shia mali, ken o benoka aliba court tem metetdakja mali aser ken o koba tashi jembidarar shia mali, ta metetdaksü.

"Item ken o bushisüingdangba inyakim nung tashishitsü lir aser ozüing benokba agency balalai aibelenertem maitsü jangjatsü arendakbaji ajanga police force nem tenüing menük dang bener arutsütsü. Bushisüingdangba agency temi aibelenertem nem temerenshi magütsüner ama court-i reprangteter," ta Isa-isa metetdaksü.

"Ozüing alema inyakerteri sorkar ketdangsertem amokmerener ama reprangteter. Ano khenkhenbo Muslim nungertemi meyong kiojentem kümzüksü melen ozüing alema inyakerteri ang pusemer," ta Chief Justice-i metetdaksü.

Isa-i Faisalabad Police Investigation Superintendent dang, Khristantem anema inyakerteri menokdangtetba ketdangsertem anema kechi inyak?, ta asüingdang. Superintendent-i, tang tashi bushisüingdangdar aser Khristantem amakertemji Muslim extremist political party Tehreek-e-Labbaik Pakistan (TLP) nung züingsemtem leniba nung liasü, ta ashi.

Tesüsa Isa-i Punjab province Police dang asentenshir item ken o bushisüingdang aser aibelenertem anema ken o akatsüsa inyakang; ketdangsertemi shidak meinyak nungbo mapa nungia anentsütsü, ta metetdaksü.

Pakistan Supreme Court nung Chief Justice-isa Punjab province sorkar dang longkak aitdang raksatsüba Tenla kitem teyangsulshidak osang tejangja den takoksa angur Khristantem nem teyari agütsüba report tejangja agüjang, ta tuyuogo.

Isa-i, Jaranwala nung tatalokba ya shisaliok agi

anüingba, osang tai prokba, tesempa aser melung melemtetba ajanga lir; ozüing alema inyakerteri yimsü tenüing amer Muslim nungertemi masüba minorities amak, ta metetdaksü.

Supreme Court-isa, linük nung senso ajak kasa züingshitsüla aser yimsü nung ajemdaker tesempa proka yimtenren nung tajanzük angutsü atema meinyaktsüla, ta metetdaksü.

Supreme Court obendangji Arogo lenirtemi pelaa agizükogo.

Osangbener den jembidang Church of Pakistan nung Tir, Azad Marshall-i, "Jaranwala nung sensaker Khristantem nem ochi temeden agütsütsü teimla angur. Iba ken o bushisüingdangba maparen dak sendakba nung Pakistan nung chief justice-i onok tebilemtsü angateta obendang agütsüba atema onok (Khristantem) kanga pelar," ta metetdaksü.

Jaranwala nung tatalokba anema ken o benokertem rongnung ka aser Khristan putir, Rev. Khalid Mukhtar-i, Supreme Court-i Punjab province sorkar nem item obendang agütsüba ajanga Khristantem nem teimla agütsür, ta ashi.

Yaküm August ita nung Khristan anati 'Quran' raksatsü, ta tai tonglokja Muslim nungertemi longkak aita Tenla ki 20 dak tema raksaja liasü.

Faisalabad district nung aliba mosque ka nungi dokantem shibangtsü sangoktsüba sülen Muslim nungertemi longkak aita Tenla ki 20 dak tema raksaja liasü.

Parnokisa Khristantem meyong ki noklang aika rongdoktsü; iba tatalokba sülen Khristan 1,000 jungnüa jenshia liasü.

Tang alima nung Khristantem alitsü tamajungtiba linük 50 rongnung Pakistan ya jenjang 7buba nung lir (Open Doors' 2024 World Watch List).

## ANOGO ABEN TSÜNGREM DEN

## TAMANG TANELA KI YANGLUSHIANG

Tenemi tuang aser sung bener aluang, aser kiji yangluang; aser ni sentsüwangshitsü ta Kibubai ashir.

-Hagai 1:8

Yihuda nungertem tepuokdak nungi shilanger Yirusalem nung liyonga aodang par tsükchirtemi raksaja rongdoktsüba jaratem aser tobur tajung Yirusalem tenlaki teraksa kecha yanglushitsü mebilemi pei taküm kibong asoshi ali mapa kisüing nung onsara mazüing aritepa liasü. Yamaji kodang parnok mapa tamajung anema Kibuba terasaba arutsü indang Haggai ainkar ajanga sangoktsü, Yihuda nungertemi temulung tanga par tai tamakok nungi meyipa Tsüingrem jak bushi aser teraksa ajak yanglushia tenzük. Kodang parnok lenmang tamajung nungi meyip, Kibubai parnok kanga moaja parnoki pa ozüingtem benshia ali tashi taso shia anisüingzüka ali.

Alemlü Yihuda chirtem lokti taküm jenjang den kodang tanü asenok Khristanpurtem taküm medemdangdir, asen danga teyangluri kanga mepelatsüsa lenmang aisü nung inyaka jaklar. Ali wadang, ali taküm nungdak den aritepdang asen tanela kibo kenyongi senzüka yutsüba tamanger agi tanü sünga kümogo. Yamai dangsa lira, aser asen Tsüingrem nungi shisatsü bushia asen tamang tanela ki meyanglushira kishizüing nung tesama tasüba monga lir, iba jagi asen meyoktsü. Arung, asen tamang tanela ki yanglushidi.

Oh Kibuba, ya akümüli nung alidang tarutsü tanela ki ka renema ajangzüksetba tamanger küma litettsü nai yariangma. Amen.

## Central Training Institute, Dimapur nung Uniform Sunday Service agi



**Dimapur, Tsüklai/February**

**18 (TYO):** February 18, 2024 nü (Amongnü) Home Guards, Civil Defense aser SDRF Baptist Church-i Central Training Institute, Dimapur nung küm shia agiba Annual Uniform Sunday Service agiogo, ta sangdong ka ajanga metetdaksü.

Iba sentong ya Nagaland Police Baptist Churches Association (NPBCA)-i küm shia agiba program den sendaktepa lir; aser tanü iba sentong nung department officers ajak aser Dimapur District aser Central Training Institute (CTI) nungi staff tem aden.

Iba tekülem sentong nung jembidang Deputy Commandant General (DCG), Medozhalie Pienyu-i lokti dang Küm Tasen

temoatsü agia pei taküm tanaben asadangtsü aser Tsüingrem den chichia alitsü ayongzüka liasü. Paise department nung staff tem dang chichiba Khristantem ama inyaksü aser pei mapa agi Tsüingrem tenüing sentsüwangshidaktsütsü nungdak, ta ayongzük.

Iba sentong ya Chief Instructor, Ngongvai E. phom leniba nung agi aser Pastor Asemba Longchar-i Department nung Uniformed Staff tem atema sarasademja liasü.

Kasa sentong nung Dimapur District aser CTI staff temi ken aten.

Senong tetenzüklen JA Maongkaba-i Tsüingrem temoatsü meshia sarasadem, SI Viboto-i Lai azüing aser Women leader, Khrienuo-i Tsüingrem O lemsatempa liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sojenyangjen**

(n) so alia arudak (place of origin)

\* Asen sojenyangjen lima mamadoki anepalutsüla.

**Sojong**

(n) süng agi yangluba so tulu ( wooden plate with legs)

\* Obalai sojong nung dang chiyonger.

**OLONG PAITEP # 6702**

1		2		3		4	5		
				6					7
		8							
9				10		11			
			12					13	
						14			
16						17			

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S\_ \_ \_ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

**OLONG PAITEP # 6701 TELANGZÜBA**

**TIPIEN :**

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

**LANGTSÜNGLEN :**

- 2. Anga, 3. Yabang, 4. Tarok,
- 5. Orak, 8. Ainer,
- 9. Anema, 10. Jabili,
- 11. Among, 12. Miim,
- 13. Anem.

**NAI-A YA METETTER MA**



Küm 147 sülen Yashasvi Jaiswal-i Twin World Records yanglutet. Rajkot nung India aser England tsünga third Test asaya nung India nung asayar Yashasvi Jaiswal-i Test career nung second double century yangluteta liasü. Jaiswal-i double century tanabuba yangluba mapang paisa Wasim Akram indang record den kasa Test innings nung sixes teimba (12) züktok.

**Sikkim CM-i Gangtok nung Multi-Level car parking lapoktsü**



**Gangtok, February 18, 2024**  
**(Agencies):** Sikkim Chief Minister Prem Singh Tamang-i Deobarnü West Point mall nung Multi-Level Car Parking facility aser Foot Over Bridge lapoktsüogo.

Iba apu ya lightweight materials amshia yanglu aser Richter scale nung magnitude 7 tashi menoknok kokteta lir, ta

Chief Minister Tamang-i ashi. "West Point, Gangtok nung Foot Over Bridge aser Multi-Level Car Parking lapokba atema kanga pelar. Sorkari urban landscape tajungba kümdaktsütsü aser yimti ajungalen infrastructure yanglutsü tenangzükba lir" ta pai ashi.

West Point, Gangtok ya 3.75

square feet nung mega-development ka lir aser iba ajanga Gangtok ajunga melenshitsu. Gangtok Smart City Development Limited den yaritepa commercial aser multi-level parking complex yanglutsü. Multi-Level Car Parking nung gari 400 parking space lir aser iba den waiting areas, toilets, aser first aid facilities lir.

**Vice President Dhankhar-i Feb 20 nü Arunachal semdangtsü**

**Itanagar, February 18, 2024**  
**(Agencies):** India Vice President Jagdeep Dhankhar-i February 20 nü Arunachal Pradesh semdangtsü atema Itanagar-i arutsü.

Dhankhar-i Indira Gandhi Park nung 38 buba Statehood Day nung adentsü ta osang

angazüker. February 21 nü paisa Raj Bhawan nung state award ceremony agitsü.

Honibar nungi tenzuka Capital district administration-i Raj Bhavan, Itanagar nung 500 metres temeket nung 144 CrPc ozüng agütsüogo.

Capital Deputy Commissioner Talo Potom-i tetuyuba agütsüba ajanga nisung 4 mesüra tema adenshitsu noktanger.

Iba tenokdangba ya February 21, 2024 tashi alitsü ta sorkar ketdangsur kati ashi.

**Manipur nung security forces-i prangpong-injang aika ngutetogo**

**Imphal, February 18, 2024**  
**(Agencies):** Manipur nung security forces-i hill aser valley district tem nung tesem kar mita aodang prangpong-injang aika ngutetogo.

Iba mapang parnoki Thoubal District nung 81 mm Improvised Mortar, Single Barrel Rifle, 36 HE Hand Grenade, Hand Grenade No. 90 MK-3, 38 mm Anti-Riot Rubber Bullet, Tear Smoke Shell Soft Nose, 2 Inch Mortar Shell with case, 40 mm

Lathode Bomb, 7.62 mm ammunitions, 5.56 mm Blank Cartridge, SLR magazine aser Improvised Exploded Shell angu.

February 15 nü Kangpokpi district kübok Koubru ridge anasa mita aodang SLR with magazine, 9mm pistol, hand grenade 36 aser 10 7,62 mm rounds nguteta liasü.

Maneni, Kangpokpi district kübok North Changoubung nung mita aodang carbine machine gun with magazine, 7,62 SLR

magazine, 36 hand grenade, wood piercing shell, local made pump ngutet.

Sepaitemisa Churachandpur district kübok Haijang arem min mita aodang single barrel, 7.62 country made rifle, tear gas launcher along with one full ammunition box containing 24 rubber bullet (cartridge 38mm Anti-Riot), AK 47 with one magazine & 3 live round, 9mm pistol with four magazine aser 9mm ammunition ngutet.

**Arunachal paper temai adokba bilemteta PAJSC-i Black Day among**

**Itanagar, February 18, 2024**  
**(Agencies):** Arunachal Pradesh sorkari Arunachal Pradesh Public Service Commission (APPSC) atema teinyaktsü meinyakba atema tejashi nung Pan Arunachal Joint Steering Committee (PAJSC)-i lungkak aitba sentong ka ayonga agiogo.

APPSC paper temai adokba sülen küm ka ajungba bilemteta PAJSC-i Black Day ta ser sentong balala ayonga agiogo.

Parnoki Itanagar capital region mokdang aser ibaji Statehood Day benjung among tashi alitsü ayongzükogo.

PAJSC-i 'Pushtak Jalao Andolan' ayonga kakettem rongdok aser committee indang 12-point Charter of Demands meinyakba atema tejashi sayu. 6 Mile tesem nung Gyamar



Padang kürakyanglu ka yanglutsü alidak PAJSC-i kakettem rongdok.

Külen, Mowb 1 park nung sentong balaka ayongzük aser idangji cake-cutting ceremony ka agia liasü. Ajisüaka iba ya benjung ka masü saka Arunachal Pradesh state minister temi tamakok anguba atema cake arang.

Iba sentong nung cakes 63

arang aser ibaji Arunachal Pradesh MLA 60 aser Member of Parliament 3 tamaitüsü liasü.

"Minister tem külemi tamakok anguba sayua cake-cutting ceremony agi. Tawa assembly session nung MLA shingai paper leakage ken o benoka mejembi aser ola madok" ta PAJSC vice-chairman Tadak Nalo-i ashi.

## Pakistan nung sorkar kumtetsü PML-N aser PPP tsüngta tangatetep kati maruteter



Election nung tim masüba mapa inyakba anema Pakistan indang taoba ato kilonser Imran Khan'er Pakistan Tehreek-e-Insaf (PTI) bhukumer temi Karachi nung longkak aitiba noksa nung angur.

**Islamabad, Tsüklai/February 18 (Agencies):** Coalition sorkar ka kumtetsü asoshi Pakistan Muslim League-Nawaz aser Pakistan Peoples Party tsüngta jembishinüba nung tangatetep kati maruteti lir ta Deobarnü osang kar ajanga ashi, ajisüaka telok anaprongi jembishinü nung terenlok lir ta ashir.

Party ana indang Contact and Coordination Committees (CCCs) senden tasemben Honibarnü amen saka tangatetep kati maru aser tashi lemsar yimsü asütsü atema tatem kuma jembitsü atema ano Hombarnü ajuruteptsü lemtet.

Iba senden amenba sülen PML-N ajanga sangdong ka agütsüba nung, anatsülen jembishinü nung terenlok lir ta ashi aser democratic sorkar tashi tait ka nüngdaker ta nenshia ashi.

"Party temi benokba onüktem kanga junga jembioigo aser terenlokba lir, aser ken o tatem kuma renemtsü asoshi ano jembishinütsü nüngdaker," ta party ana ya külemi sangdong ka nung ashi.

Nawaz Sharif-i aniba PML-N yagi ato kilonser menden asoshi Shehbaz Sharif shima lir. February 8 nü agiba election nung taoba ato kilonser Imran Khan'er Pakistan Tehreek-e-Insaf party ajanga National Assembly meden 265 nungi menden 93 nung takok ngua liasü.

PML-N yagi menden 75 nung takok angu aser PPP yagi

jembiner.

Sorkar kumtetsü asoshi jembishinüba indang tejangja meteta alr PPP ketdangsur kat osangbener dang ashiba agi, par teloki National Assembly indang speaker aser Senate chairman menden bushitsü telemtetba agiogo.

Ajisüaka PML-N yagi memulunger amai aser National Assembly indang speaker menden ya parnoki aginer, ta PPP leniri ashi.

Punjab nung PML-N ya single largest party lir aser parnoki menden 137 nung takok angu. Parnoki yangji chief minister inyaksü atema Nawaz Sharif'er jala Maryam Nawaz Sharif shimogo.

Kasa mapang Rawalpindi indang commissioner-i general elections nung pai dena tim masüba mapa inyak ta nangzükba ajanga Pakistan tesem ajungalen election agiba nung temulung melemi Pakistan Tehreek-i-Insaf (PTI) aser par den sendaktepa aliba party temi Chief Election Commissioner aser Chief Justice mapa nungi anentsü akhanger.

PPP-ia iba ken o bushisingdangtsü akanger, saka PML-N ajanga Rawalpindi indang commissioner ya tekolok meshidak amai ashir.

Rawalpindi indang commissioner ya tekolok tera meshidak dang mestiker, aser iba yongji pai pa-sasa soseta asütsü merang ta ashi, ta PML-N lenir Rana Sanaullah-i ashi.

Rawalpindi Commissioner Liaquat Ali Chattha-i iba maparen nangzükba sülen PTI odongtari CEC Sikandar Sultan Raja aser Chief Justice Qazi Faez Isa mapa nungi anentsüla ta akanger.

Rawalpindi indang commissioner yagi votes 70,000 dak timba agi temaba jenjang nung aliba independent candidates tem tamakoker kumja stamps taila inoktsü ta nangzük.

PTI indang parliamentary committee senden ka amenba sülen osangbener den jembidang Ali Muhammad Khan-i ashiba agi, PTI nem temaitsü magütsü aser elections mapang lenir timba tepuokdak liasü, saka nüburtemi PTI bhukuma vote agütsü.

## Netanyahu-i tangbo election maginer, nüburtem longkak aiter

**Tel Aviv, Tsüklai/February (Agencies):** Tekeraba nung election agitsü akhangba Israel Ato Kilonser Benjamin Netanyahu-i magizük aser iba yongji nisung meyrirjang aika Tel Aviv aser Jerusalem nung adenshia pa ato kilonser menden nungi alutsü akhanger.

October 7 nü amakba ajanga Gaza nung rara tulu tenzükba sülen opinion polls nung Netanyahu sapur ajema kumogo.

Palestine nunger Hamas teloki October ita Israel litsü telung nung nisung 1,100 shi tepsetba den nisung 200 dak tema pua bener aoba sülen tekeraba nung election agitsü nüburtemi ola adoka arur.

Hamas teloki amakba tayang kepzüka Israel mitkari Gaza Strip nung tayimtsü aser alilen nungi makyonga arudang Palestine nunger 29,000 jungnüa tepsetogo aser nisung million 1.4 dak tema tesem balala nung jenshia lir, koba linük aikati kin ajunga samatsütsü meranger ta aitsür.

Aorkar anema longkak aiter temi 2023 küm timba Israel anokshija longkak aita liasü saka rara mapang ajema akum. Ajisüaka Honibar aonung longkak aitertem yimtung nung arua election agitsü akhanger, koba 2026 tashi magitsü sentong lir.

Police temi tenokdangba agüja liaka nisung meyrirjang aikati Tel Aviv nung longkak aita liasü, ajisüaka taoba küm longkak aitiba dang nungibo kanga tajemba, ta osang ajanga ashir.

Kasaji Jerusalem nunga Netanyahu'er official residence kima longkak aita liasü, kechiaser Hamas temi nisung 100 dak tema pua aliba tia bilema parnok ain adoker.

Gaza nung rara anentsü asoshi jembishinütsü atema Netanyahu-i Egypt yimtiba Cairo-i ketdangsurtem tajemba yokba atema mepelar ta longkak aiter temi ashi.

United States, Qatar aser Egypt lenirtemi ceasefire alitsü



Benjamin Netanyahu

aser pua alirtem chioktsü atema hopta aika jembishinüa arur, saka Israel-i akhangba aser Hamas-i akhangba nung tetsüngta tulu adoka lir. Jembishinü imlaba ama renloka maor ta Qatar-i Honibarnü shiogo.

Israel-i rara manen tashi aser kuli tejangja makai Gaza amakba magien tashi pua alirtem mechoktsü ta Hamas-i ashir aser Israel-i Palestine nunger noklang aika pua aliba chioktsü akhanger.

Netanyahu-i yimjak nung itemji magizük aser Hamas indang ceasefire sentong ya kodanga mataloktsüba lir ta ashi aser Palestine linük ka kumtetsü asoshi lenmang bushitsü US aser danga linüktemi akangba magizüker.

US Tir Joe Biden-i mepishiba ama taoba hopta jembishinütsü atema Cairo-i teshimtet nisung kar yoka liasü saka tanaben yokshitsü nüngdak maka ta pai ashi.

Par Likud party nungia Gaza rara atemba sülen tekeraba nung election agitsü ola adokba indang asüngdang dang, "Tang atema election ya tongtipang masü, kechiaser iba ya ajanga asenok kera telemsa adokdaksütsü. Tang asenoki telungjem nüngdaker," ta Netanyahu-i langzüa liasü.

Ajisüaka Israel Democracy Institute ajanga poll ka agiba nung Israel nunge asems

## Thaksin Shinawatra parole nung chiokkogo



Thaksin Shinawatra

**Bangkok, Tsüklai/February 18 (Agencies):** Thailand nung mapa tamajung inyakba ken o nung aija alisang taoba ato kilonser Thaksin Shinawatra ya parole nung chiokba sülen linük

yimtiba Bangkok nung par kidangi shilangogo.

Billionaire Thaksin Shinawatra ya police hospital ka nungi chiok, kong pa ochimashi mapa inyakba aser tim masüba nung tashi amshiba atema küm ka tepuokdak ayutsü obendang agüja aliba ama yua liasü.

Arishi küm 74 tan Thaksin ya küm 15 bendang lima nung jenoka lir taoba küm August ita Thailand-i aruba den külemi apu.

Pa temang majung ta sangdongba sülen aonung kata tepuokdak memejangdang.

Thaksin ya shidakbabo küm ti tepuokdak ayutsü liasü, saka pa bendang lima nungi meyipa shilanger anogo ishika tsüngta

Thailand chuba-i tatok agüja küm ka dang kumtsü.

Iba ken o jembiba nung Thailand nunger aikati aitsü aser taka-taiter aser sentsü aketertem nem teti maangka agütsür ta ashir.

"Thailand nung democratic system ka nüngdaker, kong temzüng ozüng aser obendangba yimya ajak den kasa alitsüla," ta Thailand indang Move Forward Party ajanga sangdong ka nung ashi, shirnoki tesüsa agiba election nung menden timba ngutet saka sorkar kumtetsü aliba nungi Senate nung nokdanga liasü.

"Kanga shiranger na? Parole? Kechi tashidak?" ta

Senator Somchai Swangkarn-i ashi.

Deobarnü Thaksin ya linük yimtiba nung aliba police hospital ka nungi gari nung anir aoba nguogo, kong pa ita trok munga liasü.

"PM Thaksin tanep Chansongla nung kidangi meyipa shilangba atema tenüngsang agütsür," ta government adviser aser taoba mapang energy minister inyaka alisang Pichai Nariphapan-i social media nung ashi.

"Pa temang junga alitsü aser pela alitsü aser kinunger temi pelashishia agizüka alitsü amanger," ta pai ashi.

Thaksin ta tain akumba aser

temang manemba ajanga parole angutsü temsüa liasü ta Thailand ketdangsurtemi ashir.

Parnoki pa kechi talenba nung chiokar mashi.

Thailand indang Ato Kilonser Sreththa Thavisin-i osangbener den jembidang, pai Thaksin ajurutsü sentongbo mali saka pai yimtenren tsütsü shisa lemsatepnüra sorkar nung ajaki angatsü renema lir, ta shia liasü.

Mitkar temi sorkar atsüngdoker küm ana lir 2008 küm Thaksin ya linük yutsür ao aser pa timba London aser Dubai nung jenoka liasü. Par kinungeri kumtetba Pheu Thai party ya tang Thailand nung power nung lir.

## BATC: India tetsür team-i gold nguogo



India Women Badminton team

**Tsüklai/February 18, 2024** (Agencies): Badminton Asia Team Championships nung Deobarnü India tetsür Badminton team-i final nung Thailand 3-2 agi koka otsü tasen ka yangluogo.

Deobarnü mezüngbuba asaya nung India team captain Sindhu-i mezüngbuba kija asaya nung Thailand tsür Katethong 21-12, 21-12 agi ayong ayonga koka India team tejkadang tokja liasü.

Iba sülen tarep asaya nung Treesa Jolly aser Gayathri nati set asem tashi kanga meranga asayar Thailand tsür Jongkolphan Kititharakul aser Rawinda Prajongjai na madak takok ngua liasü. Jolly aser

Gayathri nati iba asaya 21-16, 18-21, 21-16 agi akok aser India team 2-0 agi tejkadang aküm.

Ajisüaka tasembuba aser pezübuba asaya nung Thailand team nungi asayartemi tajungba asayateta parnoki iba asaya ana ya atonga akok.

Tasembuba asaya nung Thailand tsür Busanan Ongbamrunphan aser India tsür Ashmita Chaliha na tanabuba kija asaya liasü. Iba asaya ya Busanan-i 21-11, 14-21 agi koka point 2-1 aküm.

Iba sülen maneni pezübuba asaya nung Benyapa Aimsaard aser Nuntakarn Aimsaard nati tarep asaya tanabuba nung India tsür Priya Konjengbam

aser Shruti Mishra na 21-11, 21-9 agi ayong ayonga akok aser 2-2 ta team anaprongla kasasa aküm.

Asaya anana akokba sülen takoker bendangtsü atema asaya pongububa asayatsüsa aküm.

Final nunga India tsürtem rongnungi arishi küm 17 tain asaya Anmol Kharb-i nüngdaka aliba mapang nung kanga junga asayateta Thailand tsür Pornpicha Choeikeewong koka liasü.

Kharb-i iba asaya ya 21-14, 21-9 agi ayong ayonga koka India team-i final asaya 3-2 agi koka tang mezüngbuba iba asayamung nung gold medal nguogo.

## Turkish Women's Cup atema India team sangdongogo

**Tsüklai/February 18, 2023** (Agencies): Turkish Women's Cup 2024 koba Alanya nung February 21 nungi 27 tashi asayatsü lir iba atema AIFF-i tetsür senior team nung asayar 23 tenüng sangdongogo.

India tetsür team ya iba asayamung nung shilem agitsü atema Turkey-i Hombarnü apusoa aotsü, kong India team-i 2019 aser 2021 küm shilem agiogo.

AIFF Acting Secretary General M. Satyanarayan-i ashiba agi, "senior tetsür national team Olympic Qualifiers sülen tang mezüngbuba asayatsü lir aser ibayongji Turkish Women's Cup ya kanga tongtibang lir.

Asayartem Turkey-i mao tsüingda hopta ka tepeyong Bengaluru nung camp ka ayongzüka agiogo.

Iba asayamung nung India team Estonia (February 21), Hong Kong (February 24) aser

Kosovo (February 27) den asayatsü koba round-robin format nung asayatsü.

Round-robin format nung asayaba sülen koba team ajak dang temaba südir parnoki asayamung akoktsü.

India team nung asayartem: Goalkeepers: Shreya Hooda, Elangbam Panthoi Chanu, Monalisha Devi Moirangthem Defenders: Ashalata Devi Loitongbm, Ranjana Chanu Sorokhaibam, Dalima Chhibber, Juli Kishan, Astam Oraon, Shilky Devi Hemam.

Midfielders: Anju Tamang, Sangita Basfore, Karthika Angamuthu, Manisha, Kajol Dsouza, Indumathi Kathiresan.

Forwards: Grace Dangmei, Soumya Gugloth, Karishma Purushottam Shirvoikar, Sandhya Ranganathan, Sanju, Pyari Xaxa, Kaviya Pakkirisamy, Jyoti. Head coach: Langam Chaoba Devi.

## Marcus Stoinis New Zealand den masayatetsü



Marcus Stoini

**Tsüklai/February 18, 2024** (Agencies): Australia nunger allrounder Marcus Stoinis, Australia team New Zealand den T20I asem asayatsü aliba nung shilem magitetsü, kechiyong pa teberem nung timtem ka lir. Pa melena Aaron Hardie team nung züngoksemogo.

Taoba Deobarnü West Indies den Adelaide nung tanabuba T20I asayatsü lia warm-up agiba mapang Stoinis teberem atsü, saka pa asaya nung shilem agiogo. Pa yirur liaka pai batting aser bowling naprongla nung teyari agüja liasü. Pai ball 15 nung run 16 yanglu aser run 36 agütsür wicket 3 agia liasü.

Australia indang vice-captain aser wicketkeeper, Matthew Wade-a Bodhbarnü Wellington nung asayatsü aliba mezüngbuba asaya nung shilem magitetsü, kechiyong par tanur asotsü lir. Ajisüaka pa Hokolbar aser Deobarnü Auckland nung

asayatsü aliba asaya ana nungbo asayatsü imlar.

Kasa mapang nung spin bowling all-rounder Matthew Short-a West Indies den ODI asayaba mapang hamstring tera yiruba ajanga New Zealand den asayatetsü masayatetsü mejangja.

Steven Smith aser Travis Head na New Zealand den T20I asayamung atema team nung züngoksemogo. Tena West Indies denbo masayai liasü.

New Zealand aser Australia na T20I asem asayatsü aliba ya February 21 nü Wellington nung asaya-a tenzüksü aser tanabuba aser tasembuba asaya ya February 23 aser 25 nü Eden Park, Auckland nung asayatsü.

**Australia T20 team:** Mitchell Marsh (c), Pat Cummins, Tim David, Nathan Ellis, Josh Hazlewood, Travis Head, Josh Inglis, Glenn Maxwell, Matt Short, Steve Smith, Mitchell Starc, Matthew Wade, David Warner, Adam Zampa.

## Ind vs Eng: India team-i tasembuba Test kokogo



India-i ngländ tasembuba Test koker pelatepba noksa angur.

**New Delhi, Tsüklai/February 18** (Agencies): India aser England na tsüingda tasembuba test asaya India-i run 434 agi koka parnok 2-1 agi tejkadang kümogo.

Iba asaya nung Yashasvi Jaiswal-i out mesüi double century yanglu aser Ravindra Jadeja-ia wicket pongu agia India-i otsü tasen ka yanglua asaya akokba nung teyari tulu agüja liasü.

Asaya akoktsü atema tanabuba innings nung run 557 nüngdaka asayaba mapang England nunger batter temi junga masayatet aser Rajkot nung pezünübuba tatembangbuba session nung parnoki run 122 dang yanglur ajak out süatok.

Run dak sendakba nung India team-i tang Test asaya ka run timtiba agi koktetogo. Parnoki taoba mapang 2021

küm Wankhede Stadium nung New Zealand team run 372 agi koker liasü.

Asaya nung Mark Wood-i run 33 yanglur aliba mapang Jadeja-i pa out sütsüba ya kanga tongtibang liasü aser kasa mapang nung Yashasvi Jaiswal-ia tang agi tanabenbuba double century yangluogo.

Asaya nung England nunger opener Ben Duckett aser Zak Crawley na kanga kara out süadok aser iba sülen Jadeja-i ball kanga junga ona middle-order tem out süja liasü.

Jonny Bairstow aser Joe Root na amala asaya tejenia junga masayateti tena ka run pezü aser ka run tenet nung out süatok.

Captain Ben Stokes-i mapang tatsüka junga asaya ajisüaka pa-a run 15 dang yanglur Kuldeep Yadav-i out süja liasü.

Kasa mapang nung India nung tanabuba innings nung Jaiswal-i ball 236 nung run 214 yanglua liasü. Pai run 104 yanglur aliba mapang teberem nung timtem ka adokba ajanga tugatokba sülen pa tanaben meyipa aita batting amen aser double century yanglua liasü.

Pai iba asaya nung six 12 azük kong James Anderson indang over ka nung six asem atonga azükba densema lir. Iba asaya nung Sarfaraz Khan-ia kanga junga asaya run 68 yanglu aser Jaiswal nem kanga dang nüngdaka aliba partnership agüja liasü.

Iba asayamung nung Jaiswal-i tang tashi nung ajak senteper run 545 yanglu pai run timtiba yanglur lir.

India aser England na pezübuba Test asaya Ranchi nung Hokolbarnü nungu tenzüka asayatsü.

## BILEMDANGANG

"Tesayur tajung kati ajak melenshidaktsütetsü."